


TEZAUUR LITURGIC
5 OCTOMBRIE

ACATISTUL
SF. CUVIOS-
MĂRTURISITOR
GAVRIIL IGOȘKIN
DE LA
MELECHEȘ



MOSCOVA, 2000



Акафист
СВЯТОМУ
преподобноисповеднику
Гавриилу, архимандриту
Мелекесскому

Кондак 1

Избранный подвижниче и истинный
пастырю Церкви Русския, / изрядный угодниче
и твердый исповедниче Христов, /
богоблаженне отче наш Гаврииле! / Почитаем тя
любвию и похвальная восписуем ти: / ты бо в
заточении неотступно пребыл еси верен Христу,
/ в скорбех, тесноте и гонениях благодаривый
Бога. / Не престай молиться, поминая чад
твоих, / да спасет Господь взывающих и
поющих ти: // Радуйся, отче наш Гаврииле,
теплый молитвенниче о душах наших.

Икос 1

Ангельскому житию поревновавый, от юности чистоту и верность Христу Богу сохранил еси, Господеви жизньнюю своюю послужити желая, вся земная и временная оставил еси, да приобретаеши богатство неизживаемое. Сего ради и зовем тебе сие:

Радуйся, родителей благочестивых чадо богоизбранное;

радуйся, измлада ангельскими нравы украшенный.

Радуйся, чистое житие от юности возлюбивый;

радуйся, в богомыслии отрочество твое проводивый.

Радуйся, от лет юных сердце твое к подвижничеству склонивый;

радуйся, издетска к молитве и послушанию прилежавый.

Радуйся, еще во отрочестве к иноческому житию устремивыйся;

радуйся, волею своею воли Божией покоривыйся.

Радуйся, отче наш Гаврииле, теплый
молитвенниче о душах наших.

Кондак 2

Видя Церковь Русскую раздираему, яко ризу
Христову, от безбожных и злых, не убоился еси,
отче Гаврииле, но желая, аще ти есть душу свою
за веру положить, во всем последовати Христу,
темже и дарова тя Господь пастыря верна и
кротка, да упасеши овцы Его. Мы же с
благодарностию взываем Богу: Аллилуиа.

Икос 2

Разумом ти Свыше данным, богомудре
Гаврииле, о душах чад Христовых усердное
попечение имевый, темже убо ограждая их от
ереси и раскола, поученьми твоими веру
истинную в сердцах их насаждал еси. Мы же,
ведуще тя о спасении нас тако пекущаяся, с
любовию вопием ти:

Радуйся, яко ярость богоборцев ни во чтоже
вменил еси;

радуйся, яко Церкви Божией послужити не
убоялся еси.

Радуйся, пастырю, Свыше умудренный;

радуйся, благодатию Божиею просвещенный.
Радуйся, веры истинныя ревнителю;
радуйся, христианского благочестия
рачителю.

Радуйся, кротостию украшенный;
радуйся, смирением обогащенный;
Радуйся, отче наш Гаврииле, теплый
молитвенниче о душах наших.

Кондак 3

Сила Божия подается с верою призывающим
имя Его, ты же Господь сподоби в годину
тяжкую чин ангельский прияти, крепостию
Божиею именова, темже воздвигнув ты воистину
воина верна Церкви Христовы. Ты же, прияв
божественную благодать возблагодать, вопияше
Богу: Аллилуиа.

Икос 3

Имеяй велию ревность в исполнении устава
церковнаго, службу в храме благоговейно со
слезами совершал еси, такожде и глаголы Божия
неустанно проповедуяй, зело усердно пастырски
подвизался еси, самоотверженно Богу и людям

служба. Темже и мы, горение твое по Бозе
видевше, поем ти таковая:

Радуйся, чистоты ангельския исполненный
человече;

радуйся, неустанный словес Божиих
проповедниче.

Радуйся, Церкви Христовы воине доблий;
радуйся, рабе благий и верный.

Радуйся, апостольских преданий хранителю;
радуйся, церковного устава блюстителю.

Радуйся, Православия исповедниче
непреложный;

радуйся, Господа Вышняго служителю
благоговейный.

Радуйся, отче наш Гаврииле, теплый
молитвенниче о душах наших.

Кондак 4

Буря ярости и гонений, обрушившаяся на
Церковь Русскую, поглотила в пучину лютыя
скорби верныя люди Божия: мнози бо архиереи
и священники в заточении томяхуся, ты же, о
тех печалюся, любвеобильный отче, со
духовными чадами твоими, христианския любве

исполненными, втайне приношения собирая, в темницу посылал еси. Мы же, истинное твое братолюбие ублажающе, взываем Богу: Аллилуиа.

Икос 4

Слышаще безбожницы о тебе, яко пастырь почитаемый еси, и лжесвидетельствующе, наведоша на тя чреду гонений на долгия годы. Ты же, помышляя, яко сие есть в любви и вере Божией тебе испытание, со смирением неложным приял еси крест твой, радуяся, яко Господь сподоби тя пострадати и потерпети вся скорби, выпавшия Православным. Темже, мужество твое славяще, величаем тя словесы таковыми:

Радуйся, пастырю благий и любвеобильный;
радуйся, милости и сострадания к страждущим исполненный.

Радуйся, христианского милосердия верный учителю;

радуйся, неисчерпаемый в любви тайноделателю.

Радуйся, верный рабе, Христу последовавый;
радуйся, крест Его на ся вземый.

Радуйся, клеветы со смирением приявый;
радуйся, поношения с кротостию терпевый.

Радуйся, отче наш Гаврииле, теплый
молитвенниче о душах наших.

Кондак 5

Божественныя милости исполненный,
предивный отче Гаврииле, аки верный пастырь
Христовы Церкви, и в заточении твое служение
не оставил еси, обаче и в тяжких испытаниях не
престал еси помогати ближним твоим,
просвещаяй вся светом веры Православныя. Мы
же, любовью твоею согреваемии, благодарне
вопием Богу: Аллилуиа.

Икос 5

Видевше в заточении пребывающии еже по
Бозе житие твое, преподобне, не токмо людие
верующии к тебе стекахуся, помощи
молитвенныя просяще, но и разбойницы, по
злым делом своим осужденнии, познаху тя отца,
любвию преисполненнаго. Темже, воистину ты
пастыря добра почитающе, приносим ти
таковая:

Радуйся, пастырского долга непоколебимый
исполнителю;

радуйся, мира Божия благосклонный
подателю.

Радуйся, Божия благодати дивный таинниче;
радуйся, обремененных и озлобленных
скорый поборниче.

Радуйся, скорбящим велие утешение
подавая;

радуйся, незлобием твоим тяжкосердых
умягчаяй.

Радуйся, и в заточении паству твою
молитвою не оставивый;

радуйся, милосердный отче, о чадах твоих
сердцем горевый.

Радуйся, отче наш Гаврииле, теплый
молитвенниче о душах наших.

Кондак 6

Проповедь веры христианския явися само
житие твое, досточудне Гаврииле, егоже не
могуще терпети, богоборцы, не взирающе на
седины твоя и болезни, всякая прещения тебе
творяху, ты же, святыи отче, вся страдания
безропотно и мужественно претерпеваяй, в

благий Промысл Божий непоколебимо верил еси, зывая к Тому: Аллилуиа.

Икос 6

Возсиял еси Божию благодатию, юже стяжа, преподобне, за всецелое себе отречение ближняго твоего ради, темже и прослави тя Господь дары Духа Святаго, иже суть болезней исцеление и судеб Божиих тайновидение, имиже во славу Господа потрудился еси. Мы же, дивящиеся таковому о тебе Божию произволению, прилежно вопием тебе сие:

Радуйся, светильниче веры, горяй и светяй;
радуйся, стамно Божия благодати.

Радуйся, дары Духа Святаго обогащенный;
радуйся, сострадания к ближнему источниче
преистекаемый.

Радуйся, в немощи твоей тяжкия труды
понесый;

радуйся, лютый мраз, биения и поругания
терпевый.

Радуйся, смертное испив, по глаголу Божию,
неврежден бывый;

радуйся, за враги твоя по заповеди Христовой моливыйся.

Радуйся, отче наш Гаврииле, теплый молитвенниче о душах наших.

Кондак 7

Хотя всем сердцем твоим, блаженне Гаврииле, единому Господу работати, себе ни во чтоже вменил еси, труды к трудом в душе кротости и смирения прилагая, постом и бдением плоть свою умерщвляя, дерзновение в молитве стяжал еси, всех призывая верно славить Бога, в Троице Единого, и воспевати Ему: Аллилуиа.

Икос 7

Новаго показа тя Господь заступника и молитвенника о нас, грешных, яко помощию безмерною и любовью неисчерпаемою многия упасл еси ко спасению. Мы же, чтуще святую память твою, со умилением взываем ти:

Радуйся, жизнью монашескою усердно подвизавыйся;

радуйся, на ниве Христовой изрядно потрудивыйся.

Радуйся, всецелое послушание архипастырем твоим имевый;

радуйся, постом и бдением плоть твою изнуриый.

Радуйся, отче чадолюбивый, о детех твоих тепле моливыйся;

радуйся, о ближних твоих прилежно пекийся.

Радуйся, винограда Христова верный делателю;

радуйся, и за ны пред Богом усердный ходатаю.

Радуйся, отче наш Гаврииле, теплый молитвенниче о душах наших.

Кондак 8

Странник быв и бездомен, из заточения в весь свою явился еси, блаженне, не имеяй где главу приклонити, во всем уподобивыйся Христу, якоже друзи и искреннии твои далече от тебе сташа и бояхуся убо к себе прияти, ложно тя врага народа именующе. Но верен Бог любящим Его, ибо не остави тя, и Тому поем: Аллилуиа.

Икос 8

Всем был еси вся, да многия ко Христу приведеш, и вся чада твоя, светом веры, надежды и любви твоея озаряеми, стекахуся к тебе, досточудне Гаврииле, со вся страны нашея. Ты же, яко чадолюбивый отец, недуги своя превозмогая, без устали днем и ночью двери твоея души страждущим отверзал еси. Мы же ти, яко благодетелю, с любовью тепле вопием таковая:

Радуйся, многи скорби, болезни и нужды Христа ради понесый;

радуйся, странничеством твоим Христу уподобивыйся.

Радуйся, неисчерпаемый кладезю веры, надежды и любви;

радуйся, яко сердце твое уподобися неопалимй купине.

Радуйся, о сирых и убогих с любовью попечение имевый;

радуйся, бедных вдовиц в нуждах их заступавый.

Радуйся, в бедах и напастех помощи скорый подателю;

радуйся, и о всех притекающих к тебе
верный предстателю.

Радуйся, отче наш Гаврииле, теплый
молитвенниче о душах наших.

Кондак 9

Всякия скорби, болезни и труды в жизни
твоей непоколебимо претерпел еси, в сердце
твоом Единого Господа имеяй, темже мирныя,
блаженныя и христианския кончины от Бога
сподобивыйся, странствие земное совершил еси
и в Горния обители вселился еси, вознося песнь
Богу: Аллилуиа.

Икос 9

Витиям многовещанным не довлеет словес, во
еже изреци всю скорбь, еюже исполнися сердца
верных, с любовью к честным останком твоим
стекающихся, и со слезами ко гробу твоему
припадающих, и поминающих тя словесы
таковыми:

Радуйся, крине, мира Христова благоухания
исполненный;

радуйся, светильниче лучезарный,
божественным елеем наполненный.

Радуйся, лозо неувядаемая, мног плод
принесшая;

радуйся, кадильнице золотая, фимиам
молитвы к Богу вознесшая.

Радуйся, адаманте, крепость в терпении нам
показавый;

радуйся, каменю, образ твердости в вере нам
явивый.

Радуйся, столпе непоколебимый Церкви
Православная;

радуйся, светлая заре незаходимаго Солнца
правды.

Радуйся, отче наш Гаврииле, теплый
молитвенниче о душах наших.

Кондак 10

Спасение души твоея от Бога улучивый,
предивне Гаврииле, в радость Господа вшел еси,
и ныне, венцем нетленным увенчавыйся, со
Ангелы ликуеши, взирая на Всецаря Творца;
Того моли, да сподобит Господь и нас купно с
тобою воспевати Ему: Аллилуиа.

Икос 10

Стена быв при жизни всем приходящим к тебе, такожде и по смерти ны не оставлявши твоим заступлением; духом ныне пребываяй у Престола Вышняго, за всех с верою и любовию тебе молящихся тепле предстательствуеши и помощь неоскудную подаеши. Тебе бо, яко мощному заступнику о душах наших, благодарственно поем сицевая:

Радуйся, от лет ранних Бога всем сердцем возлюбивый;

радуйся, верен Тому до конца дний твоих пребывый.

Радуйся, жизнью твоею безраздельно Господеви послуживый;

радуйся, темже Царствие Небесное себе унаследовавый.

Радуйся, всех к тебе прибегающих скорый услышателю;

радуйся, о всех тебе с верою молящихся прилежный попечителю.

Радуйся, помощниче всем в бедах и напастех сущим;

радуйся, целителю душею и телом
болезнующих.

Радуйся, отче наш Гаврииле, теплый
молитвенниче о душах наших.

Кондак 11

Песнь благодарственную восписуют людие
Православнии, радующеся о толиком
благодеении Божиим, яко Церковь Русская ныне
украсися сонмом новых мучеников и
исповедников Российских, с нимиже и ты, отче
Гаврииле, вкупе веселяся в чертозах райских,
воспеваеши Богу: Аллилуиа.

Икос 11

Свет велий веры христьянския силищася
сатана затмити, седмьдесят лет мучаше и
убиваше люд Православный, темже убо сотвори
невиданное доселе воинство Христу Богу
нашему, Имже и посрамлен бысть. Тебе же, отче
Гаврииле, яко верному ратнику воинства сего,
воспеваем сице:

Радуйся, прещений нечестивыя власти не
убоявшийся;

радуйся, в роде сем Господа исповедати не
постыдивыйся.

Радуйся, иго Христово на рамена своя
вземый;

радуйся, вслед Господа тесными враты
ходивый.

Радуйся, вместо сладости земныя терния
избравый;

радуйся, ныне же нетленным венцем от Бога
украшивыйся.

Радуйся, яко Христа ради и Евангелия себе
отверглся еси;

радуйся, яко нищетою духовною богатство
неиждиваемое стяжал еси.

Радуйся, отче наш Гаврииле, теплый
молитвенниче о душах наших.

Кондак 12

Благодать Божия, еюже излился море чудес
от честных мощей твоих, предивне Гаврииле,
днесь собра вся верныя, с благоговением и
любовию чтущия святую память твою и
молящия ти: не остави нас и ныне
предстательством твоим, обидимыя заступи,
болящия исцели, в беду впавшия свободи и всех
нас сохрани молитвами твоими, да выну поем
Богу: Аллилуиа.

Икос 12

Поюще песнь благодарения Всещедрому и
Человеколюбцу Богу, прославльшему тя, яко
верного исповедника Церкви Русския, ублажаем
болезни и труды твоя, имиже во славу Божию
поработал еси, восхваляем подвиги твоя, яже за
Христа претерпети сподобился еси, почитаем
пастырскую кротость и смирение твое, яко
добре упасл еси чада Православная, и воспеваем
тя хваленъми сицевыми:

Радуйся, служителю Христов и любимиче
Божий;

радуйся, пастырю благий, смиренный и
кроткий.

Радуйся, нуждным и отягощенным неложное
вспоможение;

радуйся, скорбящим и обуреваемым присное
утешение.

Радуйся, архимандрите, духовныя овцы
добре хранивый;

радуйся, друже Божий, крест Христов
доблестне носивый.

Радуйся, любимаго Господа лик пресветлый
видети сподобивыйся;

радуйся, яко во светлости святых Его ныне пребываеши.

Радуйся, отче наш Гаврииле, теплый молитвенниче о душах наших.

Кондак 13

О преславный и достохвальный исповедниче Христов, преподобне и богоносне отче наш Гаврииле, пастырю кроткий и чадолюбивый! В умилении молебнo тебе предстоящих не презри, но твоим предстательством заступи и помози богоугодно течение жизни нашея скончати, Христа Бога верно и небоязненно исповедующе, да ныне и присно с тобою вкупе и всеми святыми поем Ему: Аллилуиа, аллилуиа, аллилуиа.

Сей кондак читается трижды, затем 1-й икос и 1-й кондак.

Молитва

О добрый пастырю и доблий воине Христов, скорый помощниче и теплый заступниче, богоблаженный угодниче Божий и Православия твердый исповедниче Гаврииле! Имеяй велие дерзновение пред Престолом Всевышняго, не остави нас молитвами твоими, с любовью и

верою к тебе притекающих. Ты бо от лет ранних юности твоя огонь любви Божественный в сердце твоём ко Господу возжег еси, жизнь свою всецело Богу посвятивый, наипаче нищету духовную стяжавый, яко раб благий, дела богоугодная кротко и смиренно творил еси, темже и надели тя Господь дары Духа Святаго, имиже и поныне точиши чудеса многая. Молим тя, отче Гаврииле, призри на люди, zde стоящая, и благодатию, ти Свыше данною, уврачуй души наша, грехом изъязвленные, исцели тела наша многоболезненная, старость поддержи, вдовиц заступи, сирых и обездоленных окорми, супружество верно сохрани. Нас же вразуми, научи и воспитай чада наша в вере Православной, дабы не уклоняться нам от правых стези, но, храняще апостольская предания, твердо Христа Бога исповедати. Ей, святче Божий! Умягчи сердца наша, житейскими попеченьями окамененная, и помози нам милосердным быти, во еже, долга христианского не забываяще, единому от меньших братьев Господа нашего Иисуса Христа милостиво послужити. Дабы, егда явится Господеву нашему во славе Отца Своего со Ангелы Святыми, в радости услышати глас Его:

приидите, благословеннии Отца Моего,
наследуйте уготованное вам Царствие от
сложения мира. Аминь.



ПОЛНЫЙ АКАФИСТНИК КАНОНИЧЕСКИЙ

АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ

I

НОВОЕ
* НЕБО